

Dumonda da la fracziun da la PBD concernent il dossier da pressa: decisiun da la CUMCO «Engiadina I»

Cun la data dals 26 d'avrigl 2018 ha la cumissiun federala da concorrenza (CUMCO) tramess a la pressa sia decisiun «Engiadina I» che cumpiglia 5 paginas. En quella ha ella publitgà ils resultats da las retschertgas davart las cunvegns da concorrenza tranter differentas interpresas da construcziun en la regiun Engiadina / Val Müstair.

Ordavant menziuneschan las sutsegnadras ed ils sutsegnaders ch'els sentenzieschan en tutta furma las cunvegns da concorrenza e beneventan explicitamain che quests fatgs illegals vegnan sclerids cumpletamain e chastiads.

L'october 2018 ha la CUMCO publitgà danovamain in palpiri cun la data dals 26 d'avrigl 2018 e cun il medem titel. Il text cuntogna dentant differenzas cumpareglià cun l'ediziun da l'avrigl. Uschia vegni menziunà en l'emprima ediziun che las cunvegns hajan già per consequenza ch'ils pretschs sajan stads en media per passa 45 % pli auts. En la segunda ediziun vegni ditg ch'ils pretschs sajan per var 25 – 45 % pli auts. En l'alineia suandant vegni explitgà che la CUMCO n'haja betg examinà, sch'igl haja insumma dà effects sin ils pretschs en consequenza da cunvegns da submissiun. Citat: «En il cas avant maun n'ha ella betg stuì e betg pudì calcular l'eventual donn per las patrunas da construcziun.» Igl è nunchapibel che la CUMCO publitgescha presumziuns ch'ella n'ha betg examinà e na po betg cumprovar. La publicaziun da la decisiun da la CUMCO «Engiadina I» ha già l'effect d'ina bumba en il Grischun. Il donn ch'è vegnì chaschunà per la politica e per il mastergn è grond. Il rest da la Svizra ha survegnì l'impressiun che cugliunarias tutgian tar il mintgadi en il Grischun.

Nus dumandain la regenza il suandant:

1. Co stima la regenza il donn da reputaziun per il chantun Grischun, ch'è resultà tras il rapport da la CUMCO «Engiadina I»?
2. Co giuditgescha la regenza la midada da la publicaziun da la CUMCO, explitgada qua survat?
3. Ha la CUMCO e/u il chantun gia pronunzià sancziuns cunter ils manaschis fallibels? Sche gea, tge sancziuns èn quai?
4. Co giuditgescha la regenza las sancziuns eventualmain pronunziadas per las lavurantas ed ils lavurants dals manaschis fallibels?
5. Co ha la regenza l'intenziun d'intervegnir tar la CUMCO areguard las publicaziuns succedidas ed areguard las decleraziuns respectivas?

Cuira, ils 24 d'october 2018

Hardegger, Aebli, Bettinaglio, Buchli-Mannhart, Casty, Clalüna, Danuser, Ellemunter, Erhard, Gugelmann, Hefti, Hohl, Lamprecht, Loi, Michael (Donat), Müller (Susch), Niggli-Mathis (Grüsch), Papa, Tanner, Widmer (Favugn), Widmer-Spreiter (Cuira), Zanetti (Sent)